

Pardonnez moy si mon audace
A este par trop couuoicteuse
Prendre ce liure et car le face
Raison menioinct la couuoicteuse
Et sa face mest tant haicteuse
Que toute seulle me plaist celle
Jamais bien assis ne chancelle

Par ce combien que peu discret
Je soye et entendu es loix
Et neautmoins que eusse a segret
Regarde et leu des exploix
Riens touteffois ne my cognois
Et suis quasi comme insauent
Remerci dieu chacun sauent

Je suis limberbe cil qui fus
Deu beuuant en la grant fontaine
Jaymay et bien peu ses beaulz fuz
Et goustay de leau douce et saine
Regracie dieu de lestraine
Et tant soit peu ce neautmoins
Doit louer dieu qui a ses mains

Et combien que leau fust science
Par ce ien deuois fort gouster
Du boire et sauouer si en ce
Je ne pouuois plus hault monter
Combien que ien soye ahonter
Dauoir puis si peu de droicture
Iniuste na loyalle oingture

Et ce nonobstant iay raison
Restaurant vng peu mes espritz
Si me dit en ceste saison
Puis que tu as ce liure pris
Si tu es bien ou mal apri
Inuocque dieu il t'aydra
Qui sert iesus luy suruiendra

Et ainsi a ce seul conseil
Je lieue vers iesus mes yeulx
Que selon mon desir et vueil
Me donnast tous mes desirs tieulx
Je le prie de mieulx en mieulx
En luy faisant ceste demande
Pecheur mal vit qui ne samende

Après que ieuz fait ma requeste
Raison me dist or donc commence
Je seray ne doubtte ta queste
Et seras en ma souuenance
Alors selon ma conuenance
Me prins a translater celle heure
Cil sert dieu qui en bien labeure

Et ce fut dans le temps d'autonne
Proprement que ie commençay
Ainsi que rasins on entonne
Et describe ie mauencay
Dont me fut estrange lessay
Juc fuz dedens et difficile
Il fait tout qui scet le stile

Quant ie euz chemine bien auant
De plus en plus tousiours tiray
Alors ie fuz vng peu scauant
Disant loeuure ie accompliray
Lors me dist raison ie seray
A tapder pour acheuer
On doit inconstance escheuer

Tant continuay mes escriptz
Que finay ou mops de decembre
En la grant cite de paris
De france le principal membre
Et fut lan comme me remembre
Mil quatre cens nonante sept
Dont soit loue dieu qui tout scet.